

2 Peter

Ngaye Peter Ngabimbom Nahni Djurra

2 Peter 1:1-2

¹ Ngaye Simon Peter, nawu ngamarnedur-rkmirri nuye Jesus Christ, dja mak ngan-munkeweng ngaye bu apostle nuye. Ngaye dja nawu bininj ngarrihni kondah ngarriwernhn-jilngmak duninjh kore ngarriwoybukwon Jesus Christ nawu God kadberre bu kanngehkeng rowk. Nungka wanjh nadjalmak duninjh, dja kandjadme bu mandjad duninjh. Bolkkime nungka ngunmarnbom ngudberre warridj ba bu ngurriwoybukwon nungka yiman ngad dja karridjarrkkarrme mahni kunwoybuk mandjal-mak duninjh. Wanjh ngaye ngabimbun nahni djurra ngudberre. ² Ngaye ngarri yiwarudj ngudberre ba bu munguyh God ngundjalwon nuye kunmodmikenh dja mak ngundjalkongibun ngudberre, bu ngurriborlhme nawu God dja mak Jesus nawu kawohrnan kadberre.

Ngurrimarnburrimen Kore Ngurrimunkekad-jung Nawu Christ

2 Peter 1:3-11

³ Nawu God dulkarrekimuk duninjh wanjh nungka kanwong nawern nawu namakmak ba bu karridarrkiddi kunmak dorrengħ, dja mak bu ngarrimarnekurdyime mandjad nuye kore karriborlhme nuye. Nungka wanjh God duninjh nawu nadjalwernhmak, dja nawu kundjalmak

kakurduyime, wanjh kunmekbekenh kankayh-meng kadberre. ⁴ Yoh, God wanjh najdalwernhmak dja munguyh kakurduyime bu djal kunmak. Kunmekbekenh kunu nungka kan-wong kadberre kunwern nawu namakmak kore kanmarnewokkurrmerrinj. Kunukka bolkkime wanjh yiman karribelbmerren nawu God, dja karriyimerran yiman nungka, dja wanjh karrid-jalbawon munguyh manbu kunwarre kore bin-inj nawu kondah kurorrebeh kabirrimarnbuu bu kabirridjaldjare kunwarre duninjh.

⁵ Wanjh kunmekbekenh ngudda ngurrid-jalkangewoybuknin, dja ngurrirohrokmen bu ngurriyimerran ngurridjalmak bininj. Dja mak munguyh ngurriborlhmen nawu God. ⁶ Munguyh ngurridjalborlhmen dja mak ngurri-marnburrimen ba bu kunmak ngurriyime, dja yuwn bu kunwarre. Yuwn bu mak nguri-warntyakmulewarren, dja wanjh ngurridjalgunjdjika nawu God munguyh. ⁷ Bu ngur-ringunjdkikan nawu God, wanjh ngurridjald-abbolknin warridj nawu birribuyika bininj bu ngurridangerrinj kore Christ, dja mak ngurri-marnedjaremerrimen. ⁸ Bu kuhni rowk ngurridjalkurduyime munguyh, wanjh kunukka minj ngurringudjyawarren, dja wanjh ngurriwern-hdurrkmirri dja ngurrikurduyime kunmak kore ngurridjalborlhmen kore Jesus Christkenh nawu Kawohrnан Rowk. ⁹ Dja nawu nangale bininj bu minj kunmekbe kakurduyime wanjh nakka nanu yiman kayime bininj nawu mimbunje, dja minj bu kawernhbolknan mandjad duninjh, dja wardi balkunibengmidjdanj kore God ngokko

bikangedjirridjbom kore kunwarrekenh nuye.

¹⁰ Nawu karridanginj, kunmekbekenh wanjh marnehmarneyime ngudberre, kab ngurridjaldurrkmirrin kore kunrayek dja minj ngurrimarrbaworren. Ngurridjalwernhburrbu munguyh bu God ngunkayhmeng dja ngunyingkihdjarrngbom, dja kunmekbekenh kunu ngurridjalkurduyimen rowk kore ngaye bolkkime bengdayhkeng, dja wanjh kunukka minj ngurriyawoyhmankan kore kunwarre. ¹¹ Dja mak Jesus Christ nungan ngunkimang ngudberre ba bu ngurringimen nuye kore nungka kawohrnan rowk munguyh munguyh. Nungka nawu kanngehkeng dja kawohrnan rowk kadberre.

Ngaye Wanjh Yawoyhbengdayhke Bu Kuninkunukenh Rowk

2 Peter 1:12-15

¹² Wanjh ngaye munguyh bengdayhke ngudberre bu kuninkunukenh kore kunwoybukkenh rowk. Dja ngaye ngaburrbun bu ngudda

ngokko ngurriborlhymeng dja mak bolkkime ngurriwernhwoybukwong manbu kore kunwoybuk ngundimarnemulewani bu ngurribekkani.

¹³ Ngaye ngayime kamak bu ngaye munguyh djadjalbengdayhke ngudberre bu ngahdjaldarkiddi, wanjh yerre kunu ngabaldowen, dja bonj. ¹⁴ Jesus Christ nawu kawohrnan kadberre

nganmarneyimeng mandjad, dja ngaye ngaburrbun bu darnkih kamre bu ngabawon ngardduk kunburrk manbu karrowen. ¹⁵ Kuhni wanjh kundjalwernhrayek duninh bu ngahdurrkmirri

ngudberre ba bu minj ngurribengmidjdan kungi
njkunu rowk wanjh yerre kunu ngarrowen.

*Ngaye Marneyime Bu Woybukkih Duninh Je-
sus Christ Wanjh God Nuye Beywurd*

2 Peter 1:16-18

¹⁶ Ngad wanjh ngundimarnemulewam bu Jesus Christ nawu kawohrnan kadberre kumwam, kundulkarre kunkimuk dorreng. Kuhni bu wanjh djalwoybukkih duninhj kore ngundimarneyimeng ngudberre. Kaluk ngad minj ngundimarneyimeninj kore bininjbeh mankarre, yiman bu bininj birrikodjkuludjad kabirrikarremarnbun manbu minj kunwoybuk bu kabirriyolyolme. Burrkyak, dja ngad kunu kunmim ngadberre ngarrihnang nawu Jesus dja mak ngarriwohburrbom bu nungka nawu nadjalwernhkimuk dja wanjh king duninhj. ¹⁷ Ngad wanjh ngarribekkang bu Ngabbard God nawu Nadulkarrekimuk duninhj dja Nawernhmakkaykenh wanjh wokdanj, biburlumeng dja mak bimakwam Jesus bu biyolyolmeng, yimeng, “Nanihnjanu bininj wanjh ngaye ngabornang. Ngaye ngamarnedjare, dja mak ngadjalnjilngmak nuye munguyh.” [Matthew 17:5; Mark 9:2-7; Luke 9:28-35] ¹⁸ Bu kumekbe Jesus ngankang ngadberre bu ngarridjarrkdi kore kurrulum manbu kubolkdjamun. Wanjh kumekbe ngadman ngarriweleng ngarriwokbekkang bu kumwokdanginj kore heavenbeh.

Karriwoybukwon Kore Bible Kabimbuyindi
2 Peter 1:19-21

19 Wanjh kunmekbekenh kunu karriwern-hwoybukwon manbu kunwok kore prophets birrimulewani. Makka manu mandjalwoybuk duninjh. Kab munguyh ngurridjalburrbu manmekbe kunwok, manbu yiman kunak kahrung dja kabolkwolkan kore kubolkmunun. Kahdjalrung kadberre kunkakkuyeng, kaluk bu Christ kamdurneng yiman kayime kunbarnangarraker-rnge kambarrhbun kore kukange ngudberre.

20 Dja mak manbu kundulmuk marneyime. Bu ngudda ngurribimnan kore nawu prophets birribimbom, wanjh kunukka minj nawu prophets bu bedmanwali birrimayalimarnbuyi kore birribimbom. **21** Burrkyak. Nawu prophets minj bedman birribimbuyi kore birridjareni, dja mak kore bedman minj birriburrbuyi. Dja wanjh nanu nungan Namalngmakkaykenh benmarnbuni bu birridjalwokdi mandjad manbu kunwok kore Godbeh.

2

Yikahwi Bininj Nawu Ngunbukkabukkan Wanjh Kabirrikurrehkurren

2 Peter 2:1-3

1 Bu kunkare, yikahwi nawu prophets birridjalkurreni bu bindidjalkoweyi nawu birribuyika bininj yimankek birriyimi bedda woybukkih prophets, dja bedda kunu birridjalkurreni. Mak yikahwi nawu bininj kabirrimre kore ngudda ngudberre wanjh yimankek bedda kunu nawu bininj kabindibukkabukkan dja wanjh nanu manmolk ngundihdjalkowe ngudberre bu

ngundimarneyolyolme kore kunwok kunwarre. Kaluk bedda kabirridjalwirrihme nawu Kawohrnан Rowk, nawu king duninjh, nawu nungan benukkarremulewam bedberre! Wanjh kunukka werrkwerrk kabirridjalbularrbuyindan. ² Birriwern bininj wanjh kabindimunkekadjung birrimekbe nawu kabindibukkabukkan kunwarrekenh kunyeme dorrengh. Kaluk nawu birribadbuyika bininj bu kabindikurdunan bedberre, wanjh kunu kabirriwirrihme manbu kunwok kunwoybuk. ³ Bedda nawu birriwarre bininj bu kabindibukkabukkan wanjh kabirrimanjngun nawu njalehnjale rowk ngudberre, dja mak bedda ngundikowe bu ngundimarneyolyolme mankarre manbu djal bedberre, dja minj kunwoybuk. God wanjh nungka korroko yingkihkarremarnbom bu kaluk kabebun, dja nawu nungka minj kakeyo!

Bu God Kayiddung Dja Kabenbun Birriwarre Bininj

2 Peter 2:4-9

⁴ Ngurriburrbu kore God kurduyimi bu kunkare. God minj benbawoyi nawu angels bu birrikurduyimi kunwarre, dja bendjalkukburriweng kanjdji kore kabolkngeyyo hell. Wanjh benukdukkan wirlmurrng nawu chains kore kumekbeh kubolkmunun. Kaluk yerrekah wanjh nungka kabewarrewan ba bu kabirri-malngdowe.

⁵ Bu kunkare duninjh nawu bininj birriwern minj birrimarnedjareniwirrinj God. Wanjh

kunu nungka benbom rowk bu kukku mandjurrkimuk bomunkeweng bedberre kore kondah kurorre, kaluk nungka minj benkongibuyi bedberre. Dja nungka bendjalngehkeng yikahwi bininj birrimak, kaluk seven bininj nawu birridjarrkni Noah, nawu benmarneyolyolmi manbu mandjad dja kunmak kore birribuyika bininj. [Genesis 6:1—7:24]

⁶ Dja mak God benwarrewam birriwern bininj kore kunred bokenh bolkngeyyoy Sodom dja Gomorrah dja wanjh bolkbularrbom bu kunnurkwern yimerranj yiman kunburle. Nungka kuhni kurduyimeng ba bu birriwarlahkenh bininj kabirriburrbun bu kumekbeh kayimerran bedberre bininj nawu kabirriwirihme nawu God. [Genesis 19:24] ⁷ Kaluk bu kumekbeni God bingehkeng nadjalkudjini nawu ngeyyoy Lot. Nawu nungka namakni dja mak njilngwarreni bu birribuyika bininj nawu birribakkeyi manbu mankarre dja wanjh kundjalwarre duninjh birriyimi munguyh. [Genesis 19:1-16] ⁸ Nungka nawu Lot, wanjh nadjalmakni bu kumekbeh birridjarrkni nawu bininj dja bennani mak benbekkani munguyh bu birribakkeyi manbu mankarre. Kaluk kore kukange nuye wanjh djareni bu kunmak birrikurduyimeninj, wanjh nungka munguyh djalnjilngwarreni.

⁹ Mah, wanjh kuhni karriburrbun kore God bendjadadmeng dja benbuni. Dja mak ngad karriwohburrbun bu nawu Kawohrnna Rowk wanjh kanngehke kadberre ngad nawu karriwokmarmang nuye kore kunyid kawernmerren kadberre. Dja nawu birriwarre bininj, wanjh nakka

kaluk kabewarrewan bu kabirrimalngdowe, dja kabebongkarrme kaluk bu kunmekbeh kunbarnangarra kabolkyimerran kore nungka kandjadme ngad nawu karriwarlah bininj rowk.

Yikahwi Bininj Nawu Kabirrikurduyime Kun-warre Kore Yiwarrudj

2 Peter 2:10-19

¹⁰ Ngayolyolme nawu birridjalwernwarre bininj nakka wanh God kabebun. Bedda wanh kabirridjalkurduyime kore kundjare ngarre kondah kurorrekenh, dja minj mak kabirriwokmarrkmang nuye nawu Kawohrnna Rowk. Bedda kabirriwernhkimukworren dja birridjallbang. Minj kabirrimarnekele birridjalmak nawu kabirrihyo kore heaven. Dja ngaleng kabirribolkdung dja kabindimarneyime kunwarre bedberre. ¹¹ Dja ngurriburr bun nawu angels nakka wanh kabirrikarrme kundulkarre kunkimuk bu kabindiyurhke birrimekbe nawu kabirrikurrehkurren bininj, dja bonj, minj bedda kabindiwokdurndiwe kunwok kunwarre dorrengh bedberre nawu kabirrikurrekurren kore kumirrk nawu Kawohrnna Rowk nuye! ¹² Birrimekbe nawu birriwarre bininj ngabenyo yolme wanh yiman kayime mayh nawu nabang, nawu bininj kabindimang dja kabindibun. Kabirridjalkurduyime njalehnjale bu mayaliyak. Kabirridjalyime kunwarre kore God, bu kabirriwirrihme kunwern kore minj kabirriburkburkbekkan. Wanh nakka nanu kaluk kabirribularrbuyindan rowk yiman kayime mayh nabang.

¹³ Kaluk yerrekah wanh manmekbe manbu kunwarre bedberre kabemarnekarremulewan,

wanjh bedmanwali kabewarrewon. Bolkkime wanjh bedda kabirriyime kunwarre kore kumburk bedberre, dja bu benbekad dja kore kurobbe, wanjh kunu kabirrinjilngmarnburren! Bu bedda ngurriraworren kore mulil ngurridjarrkngun, wanjh kabirridjalburrbun kunwarrekenh! ¹⁴ Bedda wanjh munguyh kabirrikuknarren ba bu kabirrikaliyo kore kunwarrekenh. Munguyh kabirridjare kunwarre kabirrikurduyime dja mak kabindikowe bininj nawu minj birrikangerayek. Dja mak bedda kabirriwernhburrbun bu kabirrimanjngun nawu njalehnjale. God wanjh benwarrewam dja kabendjalwarnyak.

¹⁵ Birrimekbe nawu kabirrikurrehkurren wanjh yiman birribolkbawong manbu mandolhdjad dja birridjalley kore kunwarrekenh. Bedda mak yiman kabirringunjedjikan bininj nawu ngeyyoy Balaam, nakka wanjh prophetni dja nawu beywurd nuye Beor. Dja nungka djaldjareni kore kunwarre kurdukurduyimi ba bu njalehnjale nawu mayi rowk. ¹⁶ Wanjh God mandjad duninjh bidjalmarneyimeng kore kunwarre kurdukurduyimeng. Kaluk bu kundjalmekbeni wanjh nawu nungan nuyeni mayh nawu donkey bimarnewokdanj yiman bininj yerre kunkommelk. Kaluk namekbe djal mayhni dja wanjh nakka nanu bibengdayhkeng dja mak bingurdkeng bu kore Balaam yiman bengwarrminj dja kurdukurduyimi kunwarre. [Numbers 22:4-35]

¹⁷ Nahni nawu bininj ngabenyolyolme, nakka wanjh bedda yiman kayime njilhmi manbu minj

kabokarrme kukku, dja mak yiman kayime kunkarndum nawu kunmayorrkkimuk kaburriwe. Kaluk God kabenkurrme kore kadjalwernhbolkburerri kore kadjalkak duninjh, kore kayingkihbolkyo bedberre munguyh. ¹⁸ Kaluk nahni bininj wanjh kabirribengwarre kore kabirridjalyolyolme dja kabirridjalburlumerren. Bedda mak kabirrikurduyime kunwern kore kunburrk bedberre kabenmarnbun, ba bu yiman kabindidarrkidmang bininj nawu birridedjingmey bu kabindibawon dja kabirrikelerlobme kore bedberre nawu kabirrimayaliwarre. ¹⁹ Nawu birriwarre bininj kabindimarneyime bedberre, “Ngad wanjh ngundibebke dja ngundimarnbun ba kamak ngurrire!” Dja kunukka kabindikowe. Bedda kunu wanjh bedman kabirridjaldukkayindi kore kunwarrewarre manbu bendangbalhmi dja bolkkime kabirrimarnedurkmirri manbu kunwarre. Ngurriburrbu bininj rowk wanjh kabirrimarnedurkmirri njalehnjale nawu kabenbongkarrme.

Bu Bininj Kabirrimunkebawon Nawu Jesus

2 Peter 2:20-22

²⁰ Wanjh ngaye ngabenyawoyhyolyolme birrimekbe bininj nawu ngokko birriyingkihburrbom nawu kawohrnau kadberre Jesus Christ nawu kanngehkeng rowk, dja mak birribebmerrinj dja birribawong kunwarre rowk kore kondah kurorrebeh. Dja ngaleng, yikahwi nawu kabirriyawoyhdurnden bu kabirriyawoyhbongnamerrinj kore maninjmanu kunwarre.

Wanjh nahninjanu bininj kabirridjalwernhwarremen duninh bu yiman kerrngehkenhni kunyid birrikarrmi. ²¹ Manbu God nuye kunwok wanjh makka manu mandjamun duninh bu birribuyika bindinakenwong bedberre, dja kunu birriburrbom kore kabirriyime kunmak kore God kadjare. Birriburrbom kuninkunu rowk, dja ngaleng, bonj, wanjh birribawong dja birrimirrkborledmeng. Wanjh kunukka kunwarre duninh kadjalwernhyimerran bedberre. ²² Ngudda ngurriburrbun bu bininj kabirriyime, “Nawu duruk karrurndeng bu kayawoyhngun manbu kore wehmeng nuyekih.” [Proverbs 26:11] Dja mak bininj kabirriyime, “Bu ngudda yikukdjirridjbun nawu bik, wanjh kaluk kayawoyhdurdeng kore kukih bu kabowkmerren kakukburlerriworren.” Wanjh kunmekbe kabirrikurduyime bininj nawu kabirrimirrkborledme nuye God.

3

Nawu Kawohnnan Rowk Kamdurndeng

2 Peter 3:1-10

¹ Nawu karridabbolk, ngudda nawu ngaye marnedjare, nahni djurra nawu bokenhkah ngabimbom ngudberre. Bu ngaye wanjh ngadjare ngurridjalburrbun kore kunwoybuk duninh nawu ngaye bengdayhkeng ngudberre, dja ngadjare ngurrimayalimarnburren kore kunmakkenh. ² Mah, wanjh ngurriburrbu bu mahni manu kunwok nawu God nuye prophets bu kunkareni birriwokdi kore birriyolyolmi, dja mak ngurriburrbu bu nawu kawohnnan dja kangehkeng kadberre kanmarnewokrayekwong.

Mahni mankarre nuye wanjh nawu apostles ngudberre ngundiwong.

³ Mah, wanjh ngarredjingmang bu bengdayhek ngudberre bu kuninjkunukenh. Bu kondanjkunu kurorre darnkih kayakmen bu kayiburnbunkenh, wanjh yikahwi bininj ngundimalelmang ngudberre. Bedda mak kabirridjare kore bedman kabirrikurduyime kunwarrekenh.

⁴ Kaluk ngundimarneyime, “Ngudda yimankek yiyme nawu Kawohrnan Rowk wokkurmerrinj bu kamdurndeng. Adju! Kab njalekah minj ngokko kumrawinj? Dja nawu birriyungkih dabborabbolk nawu wanjh korroko birridowerrinj, dja minj njale mak marnburrimeninj, dja wanjh kadjalrohrok kore kamyidedjingmangbeh.” Wanjh kunmekbeh kunu bedda ngundimarneyime. ⁵ Bedda wanjh kuhni kabirriyolyolme dja minj kabirridjare bu kabirriburrbun kore kunwoybuk. Bedda kabirriburrbun manbu kunngol makka wanjh munguyh kumekbeh kadjaldi kore God wokdanj, dja mak nuye kunwok marnbom kukku dja mak kunrorre bu kumbebmeng kore kukkubeh. [Genesis 1:6-9]

⁶ Kaluk yerre wanjh God munkeweng maninjmanu kukku manbu kundjurrrh kore kubolkwarlahkenh rowk, dja bularrbom yehyeng rowk manbu dingihdi kumekbe bolkyimi. ⁷ Wanjh God yawoyhwokdanj, bu heavenkah dja kurorrekah wanjh makka kadjaladbun bu kunak kamre. God kadjaladbun manbu kunbar-nangarra ngarre bu nungka kaluk kandjadme ngad nawu bininj rowk. Wanjh kunmekbeh kunu kabebularrbun bininj nawu kabirridjal-

wirrihme nawu God.

⁸ Nawu karridabbolk, ngudda nawu ngaye marnedjare, ngad wanjh karridjalburrbu kore kundjalkudjiwi. Nawu Kawohrnан Rowk, wanjh nakka nabuyika duninh, dja nungka kayime manbu mandjalkudji kunbarnangarra wanjh yiman kayime mandjalwern 1000 mandjewk! Dja mak kayime bu mandjalwern 1000 mandjewk wanjh kunukka yiman kayime kunbarnangarrakudji. [Psalm 90:4] ⁹ Kaluk nawu bininj yimankek kabirriyime nawu Kawohrnан Rowk kayime yeledj bu kakurduyime kore nungan wokkurmerrinj nuye. Dja burrkyak. Minj yeledj kakurduyime, dja nungka kunu ngundjaladbun ngudberre, dja kabenmadbun birriwern bininj kabirriwarnyakmulewarren dja kabirrikangeborledkerren kore nungka ba bu minj kabenbularrbun!

¹⁰ Dja bonj, kundjalmekbe kabolkyimerran, wanjh nuye kunbarnangarra kambebme kundjalburrikudji duninh bu nungka kamdurdeng dja kabolkwarrewan manbu kurorre dja yehyeng rowk kahdi. Kaluk ngad minj karriburrbun bu baleh kabolkyime, dja wanjh karridjalkangebarrhme bu kayimerran dja manbu kunngol wanjh makka kadjalyakmen dja kambengbun kunwok kunkimuk, dja mak yehyeng rowk kore kondah kurorre wanjh kayakmen rowk bu karung manbu manbirlukimuk kunak dorreng. [Matthew 24:43; 1 Thessalonians 5:2; Revelation 16:15]

Bu Karrimarnburrenkenh Dja Mak Karrinah-narrenkenh

2 Peter 3:11-18

¹¹ Mah wanjh, bu kuhni wanjh kayimer-
ran nawu njalehnjale wanjh kabularrbuyindan
rowk, wanjh ngurridjalburrbu kore kunmak
bu bolkkime ngurrihni, bu ngurrihwokmarrk-
mang nuye God dja mak kunmak ngurridjal-
marnekurduyimen nuye munguyh. ¹² Wanjh
ngurridjalmadbun kaluk God nuye kunbarnan-
garra kamre, dja ngurridjare werrknin kayimer-
ran. Kore mahni kunbarnangarra wanjh manbu
kungol kawurlhme dja kayakmen, dja mak
yehyeng rowk kore kurorre, wanjh mahni kunak
kunkimuk kabularrbun rowk. ¹³ Wanjh kar-
riburrbu bu nungka wokkurmerrinj, wanjh kar-
ridjalmadbun kore nungka kanwon kubolkker-
rngeh kaddum kore heaven dja mak kondah
kore kurorre. Kaluk karrihni munguyh kumekbe
ngad nawu God kanmakwan dja minj kunwarre
kahdi. [Isaiah 65:17; Revelation 21:1]

¹⁴ Mah, nawu karridabbolk nawu ngaye
marnedjare, ngaburrbun ngudda munguyh
ngurridjalmadbun kaluk kuhni kakurduyimer-
ran, wanjh ngurriwernhrohrokmen ba bu
minj kunwarre ngurriyawoyhkurdyime, ba
bu nawu Kawohnnan Rowk wanjh ngunnan
ngudda bu munguyh ngurridjalmak nuye. Kab
kuhni ngurrimodmikenhworrimen kore nungka.
¹⁵ Wanjh ngurridjalburrbu bu nawu Kawohnnan
Rowk kandjalmadbun, ba bu kanngehke.

Dja karohrok kore nawu Paul ngundi-
marnebimbom warridj. Nungka wanjh

karridangerrinj dja karrimarnedjare. Bu nungka mak kuhni bimbom kore God biwong kunmayalimak. ¹⁶ Wanjh nungka munguyh kabimbun bu kuhnikenh kore djurra nawern nuye, dja kayolyolme bu maninjmanukenh. Kaluk nuye kabimbuyindi wanjh wurd karayek dja karrirohrokme wernkih ba bu karriburrikburrkbeekan kore kamenyime. Wanjh yikahwi bininj nawu minj kunwern kabirriburrbun dja nawu kabirrimayaliwern, wanjh bedda kabirrimayaliworren kore kunwarrekenh ngarre. Bedda kunmekbeh kabirrimarneyime nawu kabimbuyindi kore Bible rowk, wanjh kunmekbekenh kabirridjalbularrbuyindan.

¹⁷ Nawu karridabbolk, nawu ngaye marnedjare, ngudda ngurriburrbun bu kuhnri rowk. Wanjh kunu ngurrinahnarrimen ba minj ngurribenbalngunjedjikan bininj nawu kabirribakke manbu mankarre manwern, dja wardi kunubewu ngudmanwali ngurrikukwarrhme kore bolkkime ngurridjaldi kore kunmakkenh. ¹⁸ Wanjh ngurridjord-miwerrimen kore ngurrikongiburrimen dja mak ngurriwernhborlumen Jesus Christ nawu kanmarnewohrnan dja nawu kanngehkeng kadberre. Wanjh karridjalwarlahkenh nawu bininj rowk bu nungka wanjh karridjalwernhburlumen nuye bu bolkkimekenh, dja mak munguyh munguyh. Wanjh bonj.

God Nuye Kunmok
The Holy Bible in the Kunwijk language of Australia
copyright © 2018 Bible Society of Australia

Language: Kunwijk (Gunwinggu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-04-22

PDF generated using Haiola and XeLaTeX on 11 Nov 2022 from source files dated 19 Jul 2021

1e76c3c7-fc1a-5488-bdac-9a98d749a074